

Мосал уйтты па нумты

Там дапат, ай кер тылац 11-мет хатадн, Пулцават вош «Наследие» нэмпи библиотекаян ар хоят ияха уйтантысат. Ши уйтантты хар нэман Даниил Васильевич Китаев шуңат 77-мет сэма питам хатлац кеша лэцатыса. Дув ханты па руц ясацтна луңтарат, монцат па потрат туса ханшас.

Даниил Китаев 1949-мет талдн Катравошн сэма питас. Дув ащел, Василий, шеңк яма ханты йис арат, потрат уйтмад па арымал. Ши тумпина нарасьюхна туса нарсдымал. Тус ям арт хулантман Даниил ши энмас. Ай пора элты дув луңтарат ханшты питас, па ши ханшам отлад кеша умац хорт щуртас. Ходна дув юх карадыты па нэхарты шеңк самаң ус. Унашак ювамн, дув потрат ханшты питас па арт нарасьюхна ёнттыя.

Катравош ашкуда 8 класс етшам юпина дув Пулцаватн училище оркестровое отделение хоца уталтыяс. Щалта солтана морфлот хоца яңхас. Рупатайл щирн округ доват каш верты хотн

хорамаң хорт ханшас, щалта «Октябрь» кина верты хотн ищи хордал поныдыяс. Ши юпина па радюва хуват ханты ясаңна потрат тус.

Ханшты па потарты ясаңдал акатты кеша дув ведпаслаты панат па вуды хотата яңхилдыяс. «Радио Ямала» па ханты ясаң передача «Тут султам» дув лэцатам арл элты поныдысаят. Марна опел пилна арыяс па Ущп ащел куйпна ёнтас.

– Мет олаңн «Катравош» нэмпи луңтар ма луңатсэм хун 80-мет талатн ашкудайна уталтысам па щикем манэм сам лыпия питас, –



Хор: scbs.yanao.ru



Хор: Татьяна Гостюхина

нумадмиман потарл Светлана Бухарова. – Шишна ма номас понтсам Даниил Китаев ханшам луңтарат, монцат па потрат иса ияха акатты. Нумастэман ищипа актама отдам йи нэпека этлат. Ши нэпекев «Нарасьюх» нэмна пондэв.

Иван Сандрин ханшам потар

Емаң хатлатан манты касапсайт

Тампуш Пулцават вошан мойң хоятат шоши мир хоятлув тайты сохат, эталтыты вулэң ухлат па кимет тал манты нярхул верты касапсайт умасьдыты верытлат.

Вулэң ухлат эталтыты касапсайн нох питты ёх ох ёша паятты верытлат. Олаң тахая этап

хоят – 25 000 солдува, кимет – 15 000, хулмет – 10 000 солдува ох шитлат.

Шоши мир хоятлув – хорам нэцат, ёх хоятат па няврэмат талдан тайты хорам сохан карэмилат. Ханты нэңдув ханшийн ёнтам сахан, ольпаң хорам охшаман, ёх хоятлув па няврэмдув думтам молсяңан па эвтам вайн шушамтылат. Ёхтыдыйм хоятат няврэмат, сахаң нэцат па молсяңаң ёх хоятат пидан умась хор верты верытлат.

Кимет талд нярхул нэхарты касапса верла. Тампуш ходна нёхи верты хар лэсытла. Кат хатл сис хоттэлат апарлад альдат. Дувидала антом туп худ па нёхи нэхарты мосал, улапсайдув альты – умась потар ястаты па хорасаңа эталтаты.

Олаң хатл касты хоятат нярхул верты сир эталтат. Кимет хаталан – вуды нёхи вер. Нох питам хоятат па мойдапса ох шитлат. Вошаң па мойң хоятат, вуды ёх емаң хатла ёхтыдыаты, хорам вантопсайт, касапсайт вантаты па умасьдыаты.

Альбина Тырлина ханшам потар

Леккардув ялап сохан шушамтыдат

Там талдан округ леккар хотатан рупитты ёх ялап сохан мадайт. Хут сёрс ветсот хоят симась сохан шушамтыты питад. Олаң пуш ай куртатан рупитты хоятат симась сох шитлат.

Леккар хотата яммалтыты ёхтыдыты ёх леккарат ар хорпи ольпаң сохан шиялаты верытлат. Леккарат – нови-восты думтап тайты питлат, ай леккарат – нови-вурты сохан яңхлат, дувидала нётты хоятат – хопшат ольпаң соха думаттадайт.

Округеван симась проект 2022-мет тал элты манал. Си пора сис яртъяң сёрс леккар думтап мийман уса.

Альбина Тырлина ханшам потар



Хор: Альбина Тырлина

Лавалса мала хорпи Нятапсэт оллат

Новоуренгойской многопрофильной колледжа онттыды нявремат элты лавалса, мала хорпи нятапсэт колледжа па вузата онттыды студентат ораңна оллат. Ши ораңна шоши мир верат пидна ропытты департамент па Новый Уренгой васна ропытты Тазовской район шоши мир верат управление, лув пидылна уйтантысат. Аратэдна ветхощъёң студент па Новый Уренгой «Ямал – потомкам!» Ассоциация.

Тазовской район хуват олты мерайт кутна, онттыда манты порайна йи пус маты ох нятапсы ол, лув щимащ студентат элты мала, хой амыдал, ащидал тацна яңхлат па хой нусая ол, ши ораңна Ямал томпына олты колледжа па техникума онттыда манта масл. Ох нятапсы тынал нийлъёң щёрс солкува. Туңащира там телефон хуват инциста рахал: +7 (34940) 2-18-29.

Ямал мув шоши мир верат пидна ропытты департамент па алаң курс хоцца онттыда манты нявремат пидна ропытал, лув орцидална ищи щимащ ох нятапсы лэцатса. Туңматта там телефон хуват рахал: +7 (34922) 6-70-23.

Там уйтантопсайна, лувилал холна энамты нэңхэт ораңна верам проектат пушци лавалса, щита тал хуват пидтащита ве-



Хор: dkims.yanao.ru



ритлат. Лув кутдална Овс мув нэңхэт фольклор па ясаң савиты авторской проект. Щимащ пидтащиты хар Ямал мувна 2022-мет тал эвалт верла. Касц тал кат энамты нох питты нэңху 50 щёрс солкува майлапсы сытал.

Всероссийской проектат оллат, щит пушци ищи лавалса. Щиты, 2025-мет тал эвалт Овс мув, Щёпар па Халэват Пелак энамты нэңхэт ораңна верты форум хоцца пидтащиты ораңна хансантта рахал.

Ши томпына, Росмолодёжь. Гранты хоцца пидтащита па нятапсы сытта. Хансантта там платформа хоцца рахал: ФГАИС «Молодёжь России».

Вера Лонгортова хансам потар

Хой Ямал мувна велпаслата веритал

Хыщам тал сус мув верат па ваят пидна ропытты служба Приуральской район велпаслаты тахайтна 92 рейд версат. Аратэдна 46 нарушение моцатсат. Ар пелак велпаслаты ях поскандал хыр лыпина ант повлат.

Туңял Приуральской район хуват 2039 велпаслаты нэпек маса: вас, лонт, няхты вай па па мета маса ваят хоцца. Шоши мир нэңхэт ораңна щимащ велпаслаты нэпек итта вута ант масл, топ велпаслаты нэпекал хоцца рахты яспас ат амасл.

Ши томпына, холна охотминимум лэцатса – велпаслаты ораңна итта, щит мет водаң партапсы. Касц нэңху, хой велпаслата дытл, нэпекат акатта масл, ши нэпекат хуват база хоцца лоңалда. Ши томпына билет хуват сат инцапса хоцца ёхлы лавта. Хой велпаслаты вер эвалт хоц пайтман ос, ищи охотминимум манта масл.

Вера Лонгортова хансам потар



Хор: Вера Лонгортова

ОБЪЯВЛЕНИЕ

Там QR-код хуват доңаты па вантаты, муйсыр нётопсайт СВО хоцца улты мохета мадайт. Ши тумпийн нэңдала, нявремдала, ақкидала па ащидала ищи нётопса вуты рахал.



СЛУЖБА ПО КонтРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ
+7 (902) 816-11-90
+7 (34922) 3-98-08
ЗВОНОК ПО РОССИИ БЕСПЛАТНЫЙ

ВРЕМЯ ДЛЯ ВАЖНЫХ РЕШЕНИЙ!

КонтРАКТНАЯ СЛУЖБА
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КонтРАКТА НА ЯМАЛЕ

Прибыльщикам из других регионов возмещаются затраты на проезд от места проживания до г. Салехарда. В период оформления проживания в г. Салехарде и 3-разовое питание предоставляется бесплатно.

ОБУЧЕНИЕ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

3 600 000 Р ЕДИНОВРЕМЕННО ОТ РЕГИОНА
до 120 000 Р СЕРТИФИКАТ НА РЕАБИЛИТАЦИЮ

400 000 Р МИНИСТЕРСТВО ОБОРОНЫ
ЗАКЛЮЧЕНИЕ ВОЕННОГО СОЦИАЛЬНОГО КонтРАКТА

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО **от 225 т.р**

Сорашак айкел моцатты ураңан

«Дух Авт» газета кашц лапат йи пуш этдыл. Тухал ишан, ёхаттал унты талаң лапат хащал. Ши веран, сорашак айкелат моцатты ураңан, нынан мосал «Дух Авт» поныдыты айкелат «ВКонтакте» па «Одноклассники» хоцца моцаттыты.

Ши ураңан там QR-код мохты доңаты, па муң верыдыты айкелдува ханшлтыяты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тыел-тохел поныдылэв, вантлэв – мата айкелат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасан елды тулэв, ханты мир ясцев шавилэв!



Хоты вулэң ёх вер Дорвош районна этты питас

Мет олаңна район доватна усат туп шоши вуды тащат. Щалта 1930-1940-мет талатн коллективизация ёхтас: колхозат па сельхозартелят акатты питсаят. Арпелак вулэң ёх колхозата лоңдат. Вулэң тащат этсат – Асовн, Доркуртан, Дорвошн. Мет олаң Мужийн, Васьёхановн па Овкуртан мет ун тащат актащсат. «Путь Ленина» нэмпи колхоз мет ун удмал. Щи порана лув нийл тащ таймал, аратл 50 щёрс вуды арат хойдымал.

ЩИ юпина па, 1961-мет тал элты колхозат совхозата лоңты питсат. Щиты район доватан кат совхоз этас – «Мужевский» па «Горковский». Худам тал хащамн, 1964-мет тал пораян лув аратл луңтам вулдылал 25 щёрса ёхтыдысат. Совхоз тащат пидан шоши вулэт ищи тайсаят, сишн, хой порайн, ияха лыдтасман, ёвра луңтыдысайт. Ин па там йис кашң вуды биркайн понда – щилта мохты ныла хой вуды тащ дыпийн ул.

Аршак нёха маты мосал

Мет олаң элты, арсыр талатн, нумассат па каншсат, хоты рахал аршак вуды энмалты, аршак нёха хорты па маты.

Щиты, 80-мет талатн совхоз «Мужевский» хоща вулэт нэман, хорты елпина, такан лапатсайт. Щи ураңна, нэман, лэты харт лэщатысайт па тохи комбикорм па соды хирт тутдысайт. Вулэт, щимащ лэвапса, яма лэсат па нёхеңа ювантысат. Щи талатна мийм нёха аршака ювантыйс.

Пора хащамн, хорсты пора па щирн лэщатты питса: хун хорсты пора ёхатл, хорты тащ потребительская кооперация хоща мада. Лув вулэт хорлат па елды тынылат. Ин па, там йисн, щи верат иса сельскохозяйственный предприятияят верлат – тащдал шавилат, хорлат па тынылат.



Хор: Николай Рочев архив элты



Емаң хатлат

Хун совхозат этты питсат, щи талат элты кашң тови Вулэң ёх емаң хатлат лэщатты питсаят. Олаңна собраний верла, потарла хоты муй верат манлат па муй мосал ямашак верты. Щи юпина касапса па каш верты



харат ларпитляят. Щалта тови, Кев уншты кеша, лэготат па пормасат лутлат. Инты унты щи вер тула.

Вулэң ухлатан йис тэдн ёх касты лэдамтылат. Щиты, курк тылащ 1945-мет талн Мужи вошн касапса удмал. Касты ёх «Путь Ленина», «Верный путь», «Имени Сталина», «Голос рыбака» па «Елап юш» колхозат элты улэң ухлатн навралтысат. Щи порана колхоз «Путь Ленина» нох питас. Олаң премия 400 солкува шитас Е.Н. Конев 6-мет тащ элты. Лув йи километра вот иты манас – 35 секунд.

Район газет «Сталин юш хуват» 1947-мет талн ханшам: «Курк тылащ 23 хаталн касапса вулэң па доваң ухлатн верам. Дован нох питмал – Филипп Чупров (100 солкува шитмал), вулэң ухадна кат хоят олаң места шитмел – Алексей Иванович Озелов (колхоз «Красный путь») па Трофим Валеев (колхоз «Путь Ленина»). Катңан 200 солкува премияян мойдысайтн.

Щалта щи емаң хатл кашң тал худам вошн постаса – Питлорн, Васьёхановн па Овкуртан. Па 2012-мет тал элты йи пуш кат талн район доватан вулэң ёх Мужи вошна актащиты питсат. Ин па худмет тал район доват емаң хатл Ханты-Мужи курт леп постада.

Иван Сандрин ханшам потар




Хор: Николай Рочев архив элты

Вещката рупитам нэңат

Ямал мувев доватан ар хорамаң, вещькат па тус ёшаң хоятат удлат. Там хащам, нэңат ун емаң хатл сыс па вулэң ёх емаң хатлат кеша муң нэңат элты потар шупиет понлүв.



Хор: Антон Максаров

Анастасия Максарова
няврэмдаң пилн.

Хор: admnuji.yanao.ru

Анастасия Архиповна Максарова

Хул ведпаслаты па вулэң ёх вер яма уятл

Анастасия Архиповна Максарова ялап тал тыдащ олаңмет хатад 1941-мет талн Ёханкуртан Љорвош районан сэма питас. Ащел, Архип Гаврилович па аңкел, Пра-сковья Афанасьевна Аляба, хул ведман усан. Анастасия 12-мет няврэм семьяйна удмал. Хул тал доватн Васьёханов ашкулая уталтыты манас. Щита няд тал уталтыйс. Љув айтэдн ащилада мис пусты, касалты па хул ведты нётас. Щи тумпина лув шеңк самалн елды уталтыты дьтса.

Сишн 1958-мет талн лув Пулңавта уталтыты манал па специальность «приём-

щик» шитал. Мохты Мужи вошн рупатая ханшлтаса па Кушеватской рыбозавода китса. Щита лув шеңк самаңа рупитас. Щишн ишканцап нэпекатн мойдам па «Доска почёта» хоща ханшлтам. Щиты, каркам нэ Окружной депутата пирылым па щи рупата щирн съездата Пулңавта яңхидьяс. Щи тумпина областной съездата Тюмень вошата яңхмал. Щи юкана ар ишканцап нэпекат па грамотаят тайл.

Ху сая манты пора ёхтас па 1965-мет талн Анастасия Архиповна Прокопий Герасимович Максаров хоща манмал. Хул

ведпаслаты вер элты вулэң ёх вер туты питас. Љын лапат няврэм энмалсаңан. Иса вещькат хоята йисат. Кат похалд вулы тащ хотатн рупитты хащсаңан. Анастасия Максарова Почётной книга совхоз «Горковский» хоща ханшман уд. Ар ишканцап нэм тайл, щит: «Мать героиня» па мевд посат «Материнская слава 2 па 3 степени». Ийикел пилн 2025-мет талн постасат хоты ияха 60 тал удлатан. Почётной знак «За любовь и верность» тайлатан. Тампуш Анастасия Архиповна сэма питама 85 тал юбилей хатл постас.

Опрацдал вер елды тул

ханшлтаса. Пенсияя манты 2011-мет тал унты щита рупитас. Еша сютчамал юпина па ёхды рупитты манас. Ант верытл ал щиты йи лотан омасты. Иса мосал молты верты. Вуды хотан рупата ар. Иса ханты нэңат хошлат.

Ийикел, Андрей Алексеевич пилн вет няврэм энмалсатан. Ун па кутоп похңалал СВО хоща солтана удлатан. Айшак эвел Пулңаватна уд па рупитал. Катңан няврэмдаң иса уна йисат, семьяят тайлат. Хидьдал энмалты нётлатан. Няврэмдаң вещьката энмалтман ураңна Любовь Григорьевна мевд посна «Материнская слава Ямала» юкантам. Тампуш лув, ван хатлап тыдащ 8-мет хаталн, юбилей сэма питама хатл постаты питал.

Ин лув юшел елды тулат: ун эвел – Анастасия па ай похалд – Пётр. Щит аңки сама мет ям, хун няврэм аңки-ащи вер елды тул. Олаңмет тащ МСП «Мужев-

ское» хоща ай похалд рупитл. Љув тащел яма шавилэд па кашң тал рупата щирн нох питыдылат.

Иван Сандрин
ханшам потар

Хор: Татьяна Паршукова

Любовь Григорьевна Артеева

Кимет вещькат нэңев ищи Љорвош район элты. Любовь Григорьевна Артеева 1961-мет талн Ёхановкуртан сэма питас. Эви опрац нэмл – Озелова. Опрацдал вулэң ёх. Щишн, иса ай пора элты лув вулы тащ пилан ванан уд. Ярхус тал доватан, 1980-мет талн совхоз «Мужевский» хоща рупатая



Любовь Артеева мевд посна мойдала.

Хор: admnuji.yanao.ru

«Тыдащ поры» Ёмвошн верса

Муң па там кутн айкел вуты щирн «Торум Маа» музей хотэвн сыр-сыр ялап постапсайт лэщатты тахаев куца ху Вячеслав Кондин инщассэв, муй щирн тамащ ханты мирэв йис емаң хатл ялпа па туңа-щира верты питса.

– Ма ин щиты туп яста-ты верытдам, хоты «Тыдащ поры» туп тата мосванан иса 2011-мет тал вуш элты «Торум Маа» музей хотэвн Ёмвошн ялпа лэщатты питсаса. Имолтыйн Нови саңхам вошн Венгрия мув хон пелак учёной Ева Шмидт шуңат «Овс мув хантэт араң-монцаң архив» пуншас. Щи тахайн наука щирн рупитам нэңат ошаңа-щаңаңа там ханты мирэв емаң хатл иса кашң ялпа ёхатты хатадн версат. Щалта юхатшак «Тыдащ поры» па «Торум Маа» музей хотэвн муң айлтыена порылдыты вуянтсув. Тамащ емаң хатлэва шеңк хув лэщатылдув. Мет олаң щёсн йис пормасат шавиты хотэвн рупитты нэңдув сыр-сыр йирасты щирн тайты хотаң войт хорасат нянь элты палдат.

Юхат талэв соханты кемн Асэвн па ёхандув хоңа йиңкев хадал. Щи ураңан йиңкати хулэв антома йил па унтатн войт ищиты антома йилат. Щиңанца тал соханты поравен ханты хоятат ищиты там ёхи хаңам хатлатн «Тыдащ поры» лэщатты щи питлат. Щиты поры щирн верам «донцаң пасанэв» нэңдувн арсыр лэтотатн талаңтэлн лап понда. Щалта йисаң-нуптаң ёх хатлэв манты щирн охдал пондат па, ялпа энамты тыдащ педа вантман, лув элтаел вохдат, лудан там талэвн кашң хатнэху тумтака па талаңа хоттэл ёхдал пилн елды ат ус. Хул-вой велпас верлад па вуды ташдал тайты щирдал ищиты туса мантсат. Хун па пойкащты верат сохнаптадайт, щи

Курк тыдащ 27-мет хатадн «Торум Маа» йис пормасат тайты хот рэп доңалн Ёмвошн улты хантэт, охалят, ёрнат па арсыр вошаң мир хоятат там талн ялпа ёхтам «Тыдащ поры» япсыена порылдысат. Щимащ емаң хатл йис вушат элты муң хантылдувн шеңк самаңа тайса. Имолтыйн советской лащ пораятн лув иса талаң тэлн ёрэматы питса. Муй щирн хоятат катрашак усат, худ па вой велпасдасат, вуды ташдал елды лавалсат, похдал-эвилал энмалсат, кашң пуш луңха-калта пойкащсат, лудан лув улапса щирдал ямашак усат.



Данил Николаевич Покачев па Анатолий Николаевич Ачимов – арсыр ханты пойкащты щират верам икеңан, мата хоятқан Сорханл район элты Ёмвоша ёхтылдысқан.



Хор: Владимир Енов

«Тыдащ поры» емаң хатадн улам хоятат.

«Торум Маа» музей хотн ялап постапсайт лэщатты таха куца Вячеслав Кондин.



Ас-угорской «Хатдые» нэмпи театр верам вантопсайң хорасат.

ёхатн-нэңатн щи лэщатла. Тампуш «Тыдащ поры» порайн пойкащты щират верты ураңан Сорханл район элты кат ханты икеңан ёхатсаңан, щит: Данил Николаевич Покачев па Анатолий Николаевич Ачимов. Ма ищи лув пилалн ияха уйтантысам па потрэмасам. Лын китамтак щимащ айкел манэма тусқан, матты ки тамащ емаң хатл овс хантылдув хоңа, ищи Ворңа хатл иты, йис порайн тыймал. Лув ясаңдал щирн, щит шеңк умащ па мосты порылдыты вер арсыр ханты мират хоятата. Щи онтасн, ванта, йис емаң хатлат ин там хатлат унты яма ед тайлдайт. Щалта щи верэд шеңк ям, хоты кашң пуш хантэт тылщев елпийн пойкащлат па тумтака, талаңа улты щират, ташаң худ-вой велпас верат иса дыеда елды япсыена улапсайдал лэщатты ураңан вохдат.

(Елды па ул)

Владимир Енов ханшам потар

Хасям сютсаты хатадан хон муев доватан нэцат емаң хатлэд постасэд. Муң па кашң аңкия, ун аңкия, опия, эвия мойлапса ясаң китлүв. Тумтака, вещьката, нуптаңа ұлаты. Муй хорпи лунтарат, потар шушиет, хорат па мойлапсайт Лоркуртаң няврэмием мет самаңа тайты хоятыел ураңан лэсятсат, там лопасан луңтадан. Альбина Бутакова потрат актас па китас.



Аңкием ураңан хорам ясңат



Хор: Татьяна Тоярова

* * *

Аңкем емаң хатадан
Хорам хоран верлэм.
Пумащипа ястадам,
Лув манэма самаң.

Регина Кельчина, 6 класс



Хор: Альбина Бутакова

Сама мосты аңкием

Ма там хатл аңкема
Мойлап ясаң ястасам:
«Ма аңкием мет хораман,
Ма аңкием мет хорасаң.
Тови хошам хатадан,
Саменан кен ат ұл.
Нопсэнан сыстам номас,
Лыпенан ой па каш».

Дарина Канева, 5 класс

* * *

Ойң аңкие, мосты аңкие,
Йи номас тайламан,
Йи хорас тайламан.
Тумтака наң уда,
Хув нупат наң тая.

Екатерина
Тендрякова, 2 класс


Хор: Лидия Паршакова

Мет мосты хоят

Аңкие – сит мет мосты, ван хоят.
Самал иса пошхийилад элты хошийл.
Ёшлад лэпатат па каврамат. Лув ашкудайн
рупитал. Иса муңева нётал, мосмаңа муңев
тайладлы, самаңа ұлты уталтал.

Хун ма уна йидам, аңкем иты верты
питлам. Аңкем шавиты, нётты. Кашң хатл
амат мойлаты.

Дмитрий Яркин, 5 класс



Хор: Альбина Бутакова

Мосмаңа тайты аңкиев

Ай кер тыдась нийлмет хатла муң аңкева
мойлапса лэсятсув. Лонсях элты лыплат версув.
Аңкем шеңк хорасаң, нопсаң. Муң лувел мосмаңа
тайлэв.

Семьяев ун. Муң иса аңкева нётлүв: ан лөхитлүв,
алаңсахат олты тахайлүв, тайты сохлүв туңа-сира
лэсятлаллүв, лэтот каварты нётлүв. Муң сиську-
рэкат тайлүв. Лув пошах тутат. Лэпат щанька
верлүв.

Муң аңкиев шавилэв, нётлэв. Яма уталтылүв.

Евгений Русмиленко, 7 класс



Хор: Матрёна Русмиленко

Ма аңқаңкем

Ма аңқаңкем каркам нэ.
Лув пилэдан унта яңхдам:
Нохар сэңклам,
вонсямот вонсьдам,
Хул ки мосал, хул мосятлам.

Тадан дохан шушамтылман,
Рэпат элты, вот итая,
Сора-сора хатэмилман.
Арылдылман, якамтылман,
Пора сора хайилдылман.

Мария Вальгамова, 8 класс



Хор: Альбина Бутакова

Юраң шовар

Унт хуват йи шовар шушас. Имомтына лув манты юшадн мойпар ики щутчатыя ил одмал. Шовар ванапак хатас па ин икел нох курытты питсалды:

– Ики-ики, нох кила-я, нох кила! Наң ма яңхты юшема олты ил кераптысан, па тахая олтэн! Ин икен нох щи верлас па шоврала щиты ястал:

– Таха! Наң муя манэм улты торас вердан? Наң хоты йисан? Щалта ки наңен тувемалэм па наң элтэн, щиңанца, муй хащал?



– Мойпар ики, нох кила-я! Наң ма яңхты юшема ил кераптысан!

– Эй, медведь, вставай! Ты чего на моём пути разлэгся!



Шовар па хоты сахат? Шеңк тарам шоврые ус па щиты ёхлы педа щи ястал:

– Я-а-а, манэм? Наң ох ведменна нумаслан, муй анта? Ма – шовар! Ма наң элтэн юраңшак!

– Муй щирн щит наң юраң?! Щикем отые: тал палат туп! – мойпар увалтас.

– Я-а-а, щиты нэш: тал пад. Я-па, мандаман-сары, вантлэман: хой юраң? Ма олңа мандам, наң ма юпеман юва па ванта, хоты илта яңхты войт па тохдаң войт, манэм шиядаман, иса лакки манты питлат, – ишканщман шовар потарал.

– Я-а-а, муй щирн? Па мандаман ки мандаман, – ин ики ястал.

Ин шовар ел щи нэхтасды, щи манал. Тыел полщаң ляксал – тохдаң войт нох пурдалат. Тохел полщаң ляксал – илта яңхты войт пуңда хухаллат. Охсар ими ещалт йис па – ищи ел хонтас. Па полщаң ляксал: ворш ики юх тай элты нох щи пурламтас, курк икен па лув юпедан ел пурлас.







Хув муй ван кутлын мантсаңан па ил щи лойсаңан.

Щиңанца мойпар икен щи ястал:

– Яна щи, наң юраң ултэн. Наңен моштаман кашң вой ел хонтал!

– Муй хорпи ма юраң, ин наң вантсэн! – шоврэн ин икел педа нюхмас. – Па ишан манэма иса ал ёвартыя!

Щалта шовар елды щи шушмас. Ин ики па, йи лотан лойман



Хор: Иван Сандрин

па нумасман, атэл яңхал па юр тайты щиты щи хащас. Ин верлад ураңан кашң тамхатл унты юраң тахайн ишканщал. шовар мув хуват щи Щи.

Роман Григорьевич Кельчин монцас, Иван Сандрин нэпека ханшсалды



СУРГУТСКИЙ
ДИАЛЕКТ

Самлэх-пэллэх пырәс икихән-имихән

(Олаң шупал № 10 луңталн)

Ики йастәл:

– Мампә тақа йәмәт йәхәм лита, молқәтәл мұв ура тит йәхмән, әсәккә пар йәхмимәнәм. Тит мұв аңкәнәш урнә тәнә тит йәхмән. Қәләм оли қор ливмән, панә айнам әнтә әвәлмән. Әсәккә йәтә қә пә арпә лил. Тиминт мәта вәр пә әнтә тәймән. Тақа тәм қәтәл қәләм оли нөв вохләмән, қәләм оли күрән войәх. Ими, өңқйуҳ тәвләк вәтимтә!

Ими өңқйуҳ тәвләк вәтимтәх.

– Аңтәп китлә қот қәннам!

Иминә китли қот қәннам. Ики наркасләл:

– Қәләм оли-йә

сурты нөв,

тәхә рөмәса-а,

тәхә қәмәса-а!

Тәми ләйәлл: вәтәң-пәлән пә-вәттә ләви, тәтәң-пәлән пәвәттә ләви қәләм оли сурты нөв, қәләм оли күрән войәх тәп әнтә чәңкләм латқә йәхәм күрән войәх, тәт ләхәлтәли. Мұв тарәм вәтнә тули, мұв тарәм қумпәтнә тули. Имихән-икихән қот тәй йәчәнәм әй сәңнам тули. Тақа қот қән йәчәнә аңтәп йәчәхә йәхмәл латнә әй пыч нөрақинты. Әй-пә тәт нәрәмтәхәл, қот вәлә йәчәнә әй пуш тәт ләрәмты. Панә пә тақа тәт имихән икихән қәрантәта йәккән, чүксәмхән.

Тақа, молқәтәл вәлә вәр ти ариаләх, имихән-икихән сәмхәл әнтә тайләхән. Лүв пә чүксәмәх қәрантәта. Лүв пә кәт-күр кат-ләмтәл.

Ики һавмиләл:

– Лапәт пәлнәп, қут пәлнәп әнәл сор нык ыхтә!

Ту қәләм оли күрән войәх сурты нөв лапәт пәлнәп, қут пәлнәп әнәл сора айнам нык мөли. Мунт вәлә йәңк тәт литатәх, вәр. Ту күрән войәх утә латмәл панә имихән-икихән лита йәхмәл әнәх күтәпа тәхә ымәл, мустәм сохит.

Имихән-икихәннә кәтәт-күрәт ал рәмқәмтәли. Тақа лүвнә ту вәйәң һавит ти йәңкә тәхә айнам ти, ту пәттынтат. Йәңк тәкәнәтә пәттынты. Лүв пә тыл-тәл сохит. Ти лив, лив, қоңәм йәңкәл сүңқәлнәт айнам ливил. Имихән-икихән өс қоңәм йәңк йиһтхән, лүв пә қоңәм йәңк йиһт.



Хор: Альбина Тырлиһна

Ливмил пырнә ики һавмиләл:

– Вәлә, ими нүң әвлән?

Ими һавмил:

– Әнтә қәлат әвләм.

– Әнтә тит қәлнә, – ики йастәл, – мампә әнтә қәлат әвләм. Моқихә киһта ливпәсәңкә қәлат йәхмән. Моқи матәм мин күрән войәх ливмин мустәмин әвләмән. Қәлнә мұв урнә тит ливпәсәңкә қәлат йәхмән? Лүв аңта вәс ар лита қәлат йәхмән. Қәлтахәл қәләм оли пупи вохләмән. Тут йә тақа тәхә әвләмән, вәйәң-лантәң войәх. Қәлтахәл сәр пупи вохләмән.

Әнтәлнә нөмәқсәхәл: «Қәлта-хәл сәр йәм порийат вәрләттән». Йә ту вәр вәли. Йә ту омәстыннә әнтәлнә нөмәқсәл: «Ики ахән һалчәхтәләм». Ики ахән һалчәхтәтәх. Ики панам ти йәх.

– Нүң мұв аңкәнәшхә ма ихнәм һалчәхтә? Молқәтәл нүң йастән, ма ихнәм һалчәхтәлән. Нүң мұв аңкәнәшхә ма ихнәм ит һалчәхтә? Әсәккә пар йәхминнам нүң мұв тәхәл мант нүң һалчәхтәлә, ма ихнам мұват һалчәхтә.

Ләвитта ти питхән. Ләхәмхә-чәк йәхмин пырнә ими қоләхнә ими ахән һалчәхты. Ими панам ти йәх:

– Нүң мұв аңкәнәшхә ма ихнәм һалчәхтә?

Ики панам ти йәх:

– Қунтә ма нүң ихнәм һалчәхтәтә? – Йоққән ләвәта ти питхән тақа.

Тәп әнтә һул вәләхтәлхән «Нүң мұв аңкәнәшхә ма ихнәм һалчәхтә?»

Йә, тақа ай вәлмәлхә питмин пырнә әй кәтәлнәт өвпи пунчәх, әй кәтәлнәт өвпи тәвәртәх, панә һатәликкә ти мән. Илә питмәлә қәхлиләмин йәқәнәм нүрәхтәх. Әнтә мәтә сәх пән, әнтә та мәтали. Йәқә тувтәх, ими өс ти панам йәх:

– Нүң қәл вәйәм һави йиңкән?

– Кәш, ими, лива, лива, та, вәйәң күрән войәх һави. Әнтә мәта қәл вәйәма, тәхә, ими, лива, лива! Литә вәра ариала! Мұв тохи мант пырилән.

Ими литә мәта нөмәсәл пә әнтәм. Ими йастәл:

– Нүң йәхлә-йохла ливәм-тайәм әтәт, тәхнам нөрәпта па раңипән.

Чәкнат, вөвнат нүңат нөк әнәмтәм, әнәмтәм.

Тақа имилнам йастәл:

– Лива! Ма йәмнам қәлнам йәңкләм. Ма вәс қоләмтәтә әтләм.

Тәрәм пәтәхләх. Аләң вәнчәна-пәчәна қәтәл, иминам йастәл:

– Ма сәх пәнам ләтта мәнләм.

Ими йастәл:

– Әнта, нүң қәлнам мәнлән. Сәх пәна кәш айнам тайләхә йәх, қул әнтә тайал.

– Әнта, қәлнә лүв әнтә тайал.

Ту сәх пән ивәл әй мөч. Мунт ту молқәтәл йәсәң қул, өс пупи вохәл. Әс мустәмин йәңк ти вәр, вәйәң һави пулта қәрасәп йәңк ти вәр. Йә тақа, ту қота йөвәтмәлә ләйләхәл: әй тәхәнә най муләмин тәп-тәп пәр кил-әтәл.

(Еллы па ул)

Аграфәна Сопочина
ханшәллы

Газета

«ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнунянца,
д. 1, каб. 106
+7 (34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д. 9, каб. 708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 75 тз

Подписные индексы:
на год – ПА700, на полугодие – ПР561

№ 11 (1314)

Газета вышла в свет 14 марта 2026г.

Подписано в печать 12 марта 2026г.

по графику: 16.00

фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб. 708)

Отпечатано в АНО «Ямал-Медиа»

Юридический адрес: 629003, Ямало-
Ненецкий автономный округ, г. Салехард,
мкр. Богдана Кнунянца, д. 1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, д. 39А

Генеральный

директор

АНО «Ямал-Медиа»

Зулинова

Марья Андреевна

Главный редактор

Яковлева

Аллина Кирилловна